

CONVENIO DE COLABORACIÓN ENTRE O CONCELLO DO CARBALLIÑO E A ENTIDADE AGRUPACIÓN DE VOLUNTARIOS DE PROTECCIÓN CIVIL DO CARBALLIÑO PARA ESTABLECER AS CONDICIÓN E COMPROMISOS APLICABLES Á SUBVENCIÓN PREVISTA CON CARÁCTER NOMINATIVO NO ORZAMENTO MUNICIPAL PARA O EJERCICIO 2023

O Carballiño, na data da sinatura dixital.

REUNIDOS

Dunha parte D. **Francisco José Fumega Piñeiro**, alcalde presidente do Concello do Carballiño (Ourense) con CIF P3202000J, exceptuado de sinalar as súas circunstancias persoais por razón do cargo que ocupa, e que actúa en nome e representación deste.

E doutra, D. **Juan Míguez Otero**, en representación da entidade **Agrupación de voluntarios de Protección Civil do Carballiño**, con CIF G32168288 que actúa en nome e representación desta.

MANIFESTAN

I. Que a **Agrupación de voluntarios de Protección Civil do Carballiño** ten como principal obxectivo diversas actividade de protección da veciñanza, así como actuación en situación de emerxencia, seguridade cidadá no desenvolvemento de eventos, atención a necesidades urxentes, así como a colaboración na elaboración de plans de seguridade e/ou autoprotección xunto coas administracións e autoridades competentes. Neste ano, que segue marcado pola COVID-19, destaca a colaboración para levar a cabo as medidas implantadas para o control da mesma.

II. Que o concello considera que o labor que realiza a dita asociación constitúe unha manifestación de interese xeral que cumpre unha función social, tamén de protección e garante da seguridade cidadá, e en continua colaboración coas actividades municipais.

III. É de interese público, o cal supón a protección dos cidadáns, a través das actividades de seguridade e protección dos veciños e actuación en emerxencias.

IV. Que a Lei 7/1985, de 2 de abril, reguladora das bases de réxime local e a Lei 5/1997, de 22 de xullo, da administración local de Galicia, posibilitan nos seus artigos 25 e 80 respectivamente, as funcións de protección civil e protección da salubridade pública, así como a seguridade en lugares públicos, recoñecendo como competencias propias dos concellos as de promoción protección civil.

V. As axudas económicas e as subvencións forman parte da actividade de fomento da que a Administración Local pode facer uso co fin de promover e apoiar actividades de interese público que contribúan á satisfacción de necesidades ou intereses propios da comunidade veciñal local. É en definitiva, unha medida de carácter económico tendente a que sexa a propia cidadanía da comunidade local, de xeito individual ou asociado, a que libremente colabore co cumprimento de fins colectivos convenientes ou desexables e non dispoñan de recursos suficientes para levar a cabo a actividade de que se trate.

VI. Que nas bases de execución do orzamento para o exercicio 2023 consta a seguinte subvención nominativa:



Aplicación orzamentaria	Entidade beneficiaria	Importe
135.11.480.00	AGRUPACIÓN DE VOLUNTARIOS DE PROTECCIÓN CIVIL DO CARBALLIÑO	5 000 €

Aplicación orzamentaria	Entidade beneficiaria	Importe
135.11.224.01	PRIMA DE SEGUROS DA AGRUPACIÓN DE VOLUNTARIOS DE PROTECCIÓN CIVIL DO CARBALLIÑO	2 500 €

VII. Que a Lei 38/2003, de 17 de novembro, xeral de subvencións (LXS), dispón no seu artigo 22.2 que poderán concederse de **forma directa** as subvencións previstas nominativamente nos Orzamentos xerais do Estado, das Comunidades Autónomas ou das Entidades Locais, nos termos recollidos nos convenios e na normativa reguladora destas subvencións, e no artigo 28, establece que os convenios serán o instrumento habitual para canalizar estas subvencións

VIII. Que o RD. 887/2006, de 21 de xullo, polo que se aproba o regulamento da Lei xeral de subvencións, no seu artigo 66, prevé que nestes supostos o acto de concesión ou convenio terán o carácter de bases reguladoras da concesión para os efectos do establecido na LXS, e determina o contido deste.

Así pois, de conformidade co establecido nas citadas disposicións, ambas as partes acordan subscribir o presente **convenio de colaboración**, o cal se rexerá polas seguintes:

CLÁUSULAS

1. Obxecto do convenio.

O presente convenio formalízase co obxecto de sufragar, en parte, os gastos derivados da **"GASTOS DE FUNCIONAMENTO DA AGRUPACIÓN PARA 2023"**.

O Convenio tamén ter por obxecto reflectir a subvención en especie recibida pola Agrupación.

2. Contía e crédito orzamentario.

A contía máxima da subvención monetaria ascende a 5.000,00 euros (CINCO MIL), que é o importe total do crédito orzamentario autorizado. O devandito crédito é un crédito do capítulo 4 "Transferencias correntes" do programa 135.11, polo que non poderán aplicarse os fondos a gastos de distinta natureza e finalidade á que é propia dos gastos imputables ao devandito crédito.

Dita contía total da subvención outorgada impútase ao exercicio económico de 2023.

A contía da subvención consistirá nunha porcentaxe do orzamento do proxecto presentado, e pode acadar, como máximo, o 90% do custo total do proxecto, sen superar os 5.000 € de crédito orzamentario.

A contía máxima da subvención en especie ascende a 2.500,00 euros (DOUS MIL CINCOCENTOS), que é o importe total do crédito orzamentario autorizado. O devandito crédito é un crédito do capítulo 2 "Gastos correntes en bens e servizos" do programa 135.11, polo que non poderán aplicarse os fondos a gastos de distinta natureza e finalidade á que é propia dos



gastos imputables ao devandito crédito. Concretamente o gasto en especie ten por obxecto financiar o seguro dos voluntarios de protección civil.

3. Duración.

Este acordo contempla a execución de actividades durante o período comprendido dende o 1 de xaneiro de 2023 e ata o 31 de decembro de 2023.

4. Compatibilidade con outras subvencións.

As subvencións serán compatibles con outras subvencións, axudas, ingresos ou recursos para a mesma finalidade, procedentes de calquera Administracións ou entes públicos ou privados, nacionais, da Unión Europea ou de organismos internacionais, sen prexuízo do que puidese establecer a normativa reguladora das devanditas subvencións ou axudas, sempre e cando o importe da subvención concedida non sexa en ningún caso de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada.

En ningún caso será compatible con outras subvencións de concorrencia competitiva do Concello do Carballiño

5. Obrigas xerais da asociación beneficiaria.

A entidade beneficiaria comprométese a:

- A. Cumprir o obxectivo, executar o proxecto, realizar a actividade ou adoptar o comportamento que fundamenta a concesión das subvencións.
- B. Xustificar ante o órgano que concede a subvención o cumprimento dos requisitos e condicións, así como a realización da actividade e o cumprimento da finalidade que determinen a concesión ou goce de dita subvención.
- C. Someterse ás actuacións de comprobación, a efectuar polo órgano que concede a subvención, así como a calquera outra de comprobación e control financeiro que poidan realizar os órganos de control competentes, tanto nacionais como comunitarios, achegando canta información lle sexa requirida no exercicio das actuacións anteriores.
- D. Comunicar ao órgano que concede a subvención ou á entidade colaboradora a obtención doutras subvencións, axudas, ingresos ou recursos que financien as actividades subvencionadas.
Esta comunicación deberá efectuarse tan pronto como se coñeza e, en todo caso, con anterioridade á xustificación da aplicación dada aos fondos percibidos.
- E. Acreditar con anterioridade a ditarse a proposta de resolución de concesión que se atopa ao corrente no cumprimento das súas obrigacións tributarias e fronte á Seguridade Social, na forma que se determine regulamentariamente.
O Concello comprobará de oficio que a Asociación non ten débedas pendentes coa facenda local.
- F. Dispor dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial aplicable ao beneficiario en cada caso, así como cuantos estados contables e rexistros específicos sexan esixidos polas bases reguladoras das subvencións, coa finalidade de garantir o adecuado exercicio das facultades de comprobación e control.
- G. Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.
- H. Manter coordinación permanente coa Área de Seguridade e Protección Civil do Concello do Carballiño.
- I. Se se realizasen actividades de difusión do proxecto, en calquera soporte, deberá



deixarse constancia da existencia de financiamento do Concello do Carballiño.

Así mesmo a entidade responsabilízase de:

- realizar as actividades que fundamentan o presente convenio;
- contar cos medios persoais e materiais adecuados para o cumprimento dos fins citados.
- velar polo cumprimento dos dereitos e obrigas que as leis lles confiran ós beneficiarios do proxecto, debendo realizar unha evolución do proxecto e da actividade.

6. Gastos subvencionables.

1. Consideraranse gastos subvencionables aqueles que sen dúbida respondan á natureza das actividades subvencionadas e se realicen no prazo establecido no presente convenio.

Á vista do proxecto presentado polo beneficiario, o importe do gasto subvencionable ascende a **5.965,69 €**. Dado que o importe da subvención outorgada son 5.000,00 €, como máximo, esta representa un 83,81 % dos gastos do proxecto presentado. Se os gastos subvencionados xustificadas correctamente son inferiores aos do proxecto presentado minorarase a achega municipal na proporción fixada neste parágrafo.

Se os gastos subvencionados xustificadas correctamente son inferiores aos do proxecto presentado minorarase a achega municipal na proporción fixada neste parágrafo.

2. Os gastos subvencionables serán **gastos correntes** con duración previsible inferior a un ano, e derivados da actividade relacionada co obxecto detallado na cláusula 1ª.

En ningún caso o custo de adquisición dos gastos subvencionables poderá ser superior ao valor de mercado.

Considerarase gasto realizado o que foi efectivamente pagado entre o 1 de xaneiro de 2023 e o 29 de decembro do 2023, a excepción de que a entidade se acolla ao recollido na cláusula 7 b) parágrafo 2º do punto 5.

7. Xustificación da subvención.

De acordo co artigo 30 da LXS, a rendición da conta xustificativa constitúe un acto obrigatorio que deberá comprender:

- a) instancia subscrita polo presidente da asociación na que solicite o pago da subvención no número de conta corrente indicada na solicitude.
- b) presentación da conta xustificativa, que comprenderá:
 - memoria detallada que inclúa declaración da actividade realizada e os resultados obtidos, financiada coa subvención e o seu custo.
 - de ser o caso, un exemplar de toda a documentación impresa xerada pola actividade que acredite a participación do Concello do Carballiño.
 - relación desagregada de cada un dos gastos realizados con motivo da actividade subvencionada, distinguindo entre gasto total e gasto subvencionable, con identificación do acreedor e do documento, concepto, importe, data de emisión e data do pagamento.
 - presentación de facturas ou demais documentos de valor probatorio equivalentes, con validez no tráfico mercantil ou laboral (Recibos de liquidación, cartas de pago, nóminas, etc.).
 - o pagamento a terceiros, que deberá realizarse dentro do prazo de xustificación recollido no punto e) desta cláusula, poderase acreditar mediante un documento expedido pola entidade financeira no que quede identificado o/a beneficiario/a, o importe e a data de pago (cartóns bancarios de crédito ou débito, talóns nominativos, transferencias



bancarias, cheques, etc.).

Excepcionalmente, en caso de que a entidade non dispoña de recursos económicos suficientes para realizar os pagos antes da xustificación, e previa declaración responsable para tal efecto, non será preciso acreditar o pagamento na presentación da conta xustificativa, e concederáselle un prazo a partir da recepción dos fondos para acreditar o pago das facturas.

Non obstante, e no exercicio das súas facultades de control financeiro, a Intervención municipal poderá realizar procedementos de control financeiro, consistentes en esixir, a partir do mes seguinte ao do pagamento da subvención a acreditación do pago da totalidade dos gastos incluídos na conta xustificativa. O incumprimento desta obriga dará lugar á obriga de reintegro por parte do beneficiario.

- declaración responsable do/a beneficiario/a que acredite que as facturas que se presentan como xustificantes foron aplicadas á actividade subvencionada.
 - relación desagregada de todos os ingresos que financian a actividade (fondos propios, subvención concedida e outras subvencións). Tamén deberá acreditarse o seu importe, procedencia e aplicación ás actividades subvencionadas.
 - certificacións de estar ao corrente das súas obrigas fiscais coa Facenda Estatal e Autonómica, así como coa Seguridade Social. O concello comprobará de oficio que a asociación se atopa ao corrente das súas obrigas tributarias coa facenda local.
 - certificación do número de conta expedida pola entidade financeira corresponden.
- c) Os gastos xustificados teñen que ser iguais ou superiores ao importe do custo total do proxecto. A contía máxima subvencionada será do 83,81% do proxecto presentado.
- d) A xustificación da subvención concedida deberá acadar o **100%** do importe total do proxecto presentado. No caso de que se xustifique unha contía inferior, a subvención reducirase proporcionalmente.
- e) **O prazo para presentar a documentación xustificativa será ata o día 31 de decembro de 2023.**

8. Forma de pago.

A entidade beneficiaria poderá solicitar un anticipo, como máximo, do 70% do importe total da subvención; que será efectivo unha vez aprobado, asinado e publicado o convenio na Base de Datos Nacional de Subvencións (BDNS). Na solicitude debe constar o número de conta onde se realizará o ingreso e acreditar que a asociación está ao corrente das súas obrigas tributarias e coa seguridade social. O restante, ou a totalidade da subvención, no caso de non solicitar anticipo, abonarase trala correcta presentación da conta xustificativa tal e como se indica na cláusula 7 do convenio.

En ningún caso poderán imputarse gastos dun exercicio diferente ao subvencionable (exercicio 2023), ou que os gastos non sexan suficientes para xustificar o importe da subvención concedida.

9. Infraccións e sancións

En materia de infraccións e sancións estarase ao disposto no capítulo IX da Ordenanza Xeral Reguladora das Subvencións do Concello do Carballiño (BOP núm. 49, de 2 de marzo de 2015)

10. Entrada en vigor e prazo de vixencia.

O presente convenio entrará en vigor unha vez aprobado polo órgano municipal competente e subscrito polas partes, mantendo a súa vixencia durante o exercicio 2023.



En todo o non contemplado neste convenio estarase ao disposto na LXS e restante normativa de aplicación.

Así o conveñen as partes e en proba de conformidade con canto antecede asinan o presente documento por triplicado en lugar e data ao principio indicados.

DOCUMENTO ASINADO DIXITALMENTE

